

Uff em See Genezareth
werrn se all vorm Sturm gerett

E Haufe Leit sinn domols kumm
versammeln sich um Jesus rum.
Das war e Stress fer denne Mann,
dass der sich nimmi helfe kann.
Er stöhnt: *Do kriesch dich grad fer Not,*
Do helft nor äns: Jetzt ab ins Boot!

Er macht e Satz, springt in de Kahn,
sein Jünger sin glei hinnedran
und duhn sich in die Rieme schmeiße.
Das Boot let ab, un uff die Weise
war'n se schunn in kurzer Zeit
vor all de Leit in Sicherheit!

Ach Gott, war das heit wieder hektisch!
Endlich Ruh! Er gähnt und streckt sich.
Ich geh mol korz in die Versenkung
un iwwerloss des Bootes Lenkung
euch, liebe Jünger. In der Zeit
do fahr'n er uff die anner Seit!

Er leht sich um un hat im Nu
die miede Aue ganz fescht zu.
Un weil er uff em Buckel leit
aus seinem Mund e Schnarcher steit.

Un lauter werd die Schnarcherei.
Do sagt de Petrus: *Ei, ei, ei!*
Was macht der heit wieder Radau,
das heert sich an jo ganz genau,
als käm do Wind uff an dem See.
De Simon ruft: *Herrjeminee,*
das is aa Wind, guck nor mol nuff,
do ziehn ganz dunkle Wolke uff!

Das gäbt e Brise, e ganz steife.
Es is net de Chef, wo du duht peife!
Kaum hat de Simon das gesaa,
do fangt's a schunn zu stürme aa.

Windstärke siwwe, beinah acht,
un dunkel werd's, als wär's schunn Nacht.
Der Sturm werd stärker un geschwind
is e Orkan worr aus dem Wind.

*Mer komme do net lebend raus,
ruft voll Entsetze Petrus aus.
Was macht de Chef, leit do gemietlich,
steert sich an nix un schnarcht ganz friedlich.*

*Sei Babbe hat uns wohl vergess.
Ich weck ne jetzt! Chef SOS!
Siehst du dann net, groß is die Not!
Mer saufen ab mitsamt em Boot!*

*Hat mer dann nirgendwo sei Ruh?
Kaum hann ich mol die Aue zu
Duhn er mich wecke. Is was los?
Was häßt das dann: Die Not is groß?
Macht um den Sturm net so viel Wind!
Ehr sinn doch Männer, Menschenskind!*

*Ei Chef, wann du versaufsch im See,
wie soll dei Story weitergeh?
Wann du heit do im Sturm kommsch um,
dann ist doch dei Geschichte erum!
Es letscht Abendmahl, Griedunnerschdaa
fällt aus un de Karfreidag aa.*

*De Parrer wisst an Oschtere net,
was er zu verzehle hätt.
Er däht do steh und wär nervööös,
der Mackebacher wär ganz Böß!!!*

*Errett uns jetzt aus unsrer Not!
Am Kreiz das is e bess'rer Tod!
Der hat e ganz anner Qualität
als wann mer do vesaufe däht!*

*Du hasch jo recht, der Tod am Kreuz
der hat e ganz besond'rer Reiz!
Viel Ehre werd mer später winke,
viel mehr als äfach zu ertrinke!
Drum werd ich jetzt dem Sturm befehle,
sich uff de Stell ewegzustehle.*

Gesagt, getan, ein Mann, ein Wort,
de Sturm packt ei und macht sich fort,
un still wie eh
ruht der See!

Doch drauß am Ufer is was los.
Do is die Begeist' rung groß.
Sie rufen laut: *Is das e Mann,
der wo dem Sturm befehle kann,
dass der sich schleicht uff leise Sohle!*
Dann duhn se *Hosianna* johle.

Doch ich dächt lieber jetzt was singe.
Muss grad noch was zum Laafe bringe.
E Playback zu me alte Schlager.
Und wann er mitsingen, klingt's net so mager.

Uff dem Zettleche, dem klää,
steht vun dem Liedche de Refrää!
Die Strophe, es sin zwää,
die sing ich dann allää!



... das Lied dazu

Melodie: Du kannst nicht immer 17 sein

*Am See kann's net immer windstill sei,
ehrlich, das kann es net.
Stürme kann's gebe, wie a im Lebe,
un wenn mer do kä Glaube hätt,
kännt so e Sturm gefährlich sei.
Doch Gott sitz mit im Boot,
er helft dir immer, immer aus jeder Not!
Aus heitr'em Himmel kommt als mol Wind,
un er rittelt un schittelt an dir
un schmeißt dich um geschwind.
Nor net verzage, wie domols a
reicht schunn machmol ä Wort un alles is wieder klar.*

Am See kann's net immer windstill sei,...

*Scheint dir die Sonn, dann sei ehrlich froh,
denn im Lebe wird's Zeite gebe,
do is net immer so
Nor net verzage, wie domols a
reicht schunn machmol ä Wort un alles is wieder klar.*

Am See kann's net immer windstill sei,...

*Un wann's ganz stürmisch wird, vertrau uff Gott.
Weil der fer alles glei e Lösung hot!*

Am See kann's net immer windstill sei ...